



Fasnacht 2009

Alti Basler Dante

sit 1947

S' näggscht Joor blyybe mer dehai - unseri Kie gänn scho gnueg CO2

De Girod dä seit jetzt zu dir:
Fertig isch mit 4 x 4.
Fahre sött sch en chline Chare,
will d' mit dämm viel Moscht duesch spare.

Die chline dörfe umefurze
uf lange Strecke und uf kurze.
Do dänkt doch mä nge: nunte fahne,
mit em Grosse bring i nie die Strecki ane.

E neui Studie zeigt uns guet,
wär do no het viel Drägg am Huet.
Me wird's nit glaube, los guet ane,
d' Bure muess me alli mahne.

Die hän e Tier in ihrem Stall,
das frisst und schisst grad überall.
Bim Wiederkäue us em Rache
duet es sogar Methanwolke mache.

Bim Schisse und grad au bim Furtze
Git's bigosch scho fasch en Churze.
Pro Tag 200 Liter und no meh
Methan das Tier duet vo sich geh.

Das Gas dieg unsrer Umwält schade,
beschleunigi dr Klimawandel ohni Gnade.
I glaub ihr händs scho alli verrote,
es got um d' Kie, wo do mien brote.

Alls dreit sich, es könnt einem Gruse,
drum, was chunnt wo hinde use.
Und jedi Kue, macht si en Furtz;
scho chunnt d' Umwält wieder z' kurz.

Dr Milchpries isch scho so im Käller
mit Abgabe für Abgas gieng's no schnäller;
Denn mache d' Bure alli dicht.
Kaffee crème, das gibt es nicht!

Oder meinsch es brucht für jedi Kueh

en Kathalisator ? Wär denn Rueh?
Kasch danke! Denn wird eine finde,
bi jedem Mensch do käm au hinde....

Doch d' Kie die dien mer wirklich leid,
gän Milch und Mischt sin stets bereit.
Jetzt sötte si, isch das so rächt? ,
an allem dschuld si, das isch schlächt!

D' Wält isch krank, das isch kei Lug.
S' Wätter meischtens en Betrug.
S' Fenomen heisst Klimawandel.
S' git sogar en Abgashandel.

Dr Leuebärger isch am Renne.
Neui Gsetz will är benenne.
Är duet au d' Kie als Sünder gseh,
will si meh Methan als Milch dien geh.

Und d' Chie die sötte dr Furtz verklemme.
Wird das dir Klimawandel wirklich hemme?
S kunnt sicher so wie 's halt muess ko.
Drum dient mir 's Kaffi crème doch lo!

*D Ladäärne-Uusstellig uff em Minschterblatz und
d' Waage- und Reggwisyte-Uusstellig bi dr Kasäärne
sin vom Määntig znacht bis am Mittwoch demoorge!
Deert und an de 3 Verkaufsständ (CINS) in dr Stadt
ka me n au alli Zeedel und Schnitzelbängg,
d' Blaggedde und dr Rädäbäng kaufe.*